

Te Kura o ngā pakeke

Taku titiro kāore e taea te whakarerekē te ia o te reo o tēnei reanga. Kua tō kē rātau i roto i tō rātau nei ao. Heoi anō tāku, tāhau he whāngai, he ārahi he tautoko me kore e waimarie.

Te mea nui rawa ia ko te noho tahi, ko te whakawhanaunga, ko te whakawhitiwhiti whakaaro, pērā i te noho a ngā tamariki.

He ora tonu kei roto i te noho tahi, kōrero tahi, ā, kai tahi. Koia nei hoki tō te Māori tōna tū. Ka mutu tonu pea te huarahi mō tātau.

Heoi,

Nāku

Nā Mate Huatahi Kaiwai

TE KURA KI RŪĀTOKI

Nā Timoti

Ko te kura tuatoru mō ngā akonga o te papa tuaono, tuawhitu o roto i ngā kura kaupapa Māori o Hoani Waititi, o Rākaumanga me Rūātoki i tū ki te whārua o Rūātoki.

Ko ngā whakatau i te hunga whakaeke ko te wāhi noho me te wāhi kai, ko te marae o Te Rewarewa. Ko ētahi o ngā mahi i whakahaeretia ki te marae tonu, ā, ko ētahi i kawea ki te kura o Rūātoki whakahaere ai.

Tino kitea ana te whai hua o ngā kura nei ki ngā akonga i tae mai, ā, mārō ake ana te āhua o te taura tangata i waenganui i ngā kura nei. Rangona ana te pai ake o ngā reo, kitea ana hoki te hīkaka o te tangata, kitea ana anō hoki kua kaha kē ake te hia whai mai kua kore kē i kaha te kōioio, te kōroiroi pērā i ngā kura i te tīmatatanga.

Whakatauhia ana me haere tonu ngā kura nei, ahakoa riro tonu ana mā ngā kura me Te Taura Whiri e pikau ngā raru. Katoa ngā kaiwhakaako e ngākau nui ana ki ēnei kura nā te mea e kitea atu ana te hiahia mai o ēnei ki te reo. Me kī pea ko ēnei te ora whakatangitangi e tōtara wāhi rua ai te rākau o kūare, o kore mōhio.

Kei kiia e kōrero ana a kūmara mō tōna māngaro engari e tino tika kē ana kia puta he mihi ki te whārua me te marae o Te Rewarewa i tino rangatira nei te manaaki i te hunga whakaeke. Pau rawa ake te wiki kua tino waho pito kē nei!

Ka mihi, ka tangi hoki ki a koutou e hine mā, e tama mā e aro nui mai nei ki te reo o ō tātou tīpuna mā koutou kē hoki e ora tonu ai te reo nei nō reira kia u, kia mau.

Ko te mihi mō tō koutou pai, mō tō koutou kakama ki te āwhina, ki te whakamāmā i te wāhi ki te iwi kāinga. Kāore he whakatenetene engari ia ko te mahi tonu.

Ko te tangi ki a koutou ka takahi nei i ngā ara o te ao whānui, koutou kua kore nei i pīrahoraho engari kua pakipaki ngā parirau kua rere. Arā te ao e tatari mai rā, tangohia ōna āhuatanga papai katoa hei painga anō mōu, ā, mō tātou katoa hoki.

Waiho mā ēnei kupu o tētahi o ngā waiata a Ngoi Pēwhairangi te whakaaro e whakatinana.

*‘Tēnā te wā ka kite anō
Tātau i a tātou katoa,
Nā te aroha i piri ai.....’*

TE KURA KI KIRIKIROA

Nā Timoti

Poke mai ana, mui mai ana, pōi mai ana a tipatere ki te kura tuatoru o te tau, ki te marae o Kirikiroa i te tāone o Kirikiroa. Kātahi anō pea ka pēnei te tokomaha o te hunga hui mai-neke atu i tōna 200 nei.

Nā runga i tēnei āhua ka pā anō ōna raruraru, arā, ko te nui rawa o ia rōpū. He nui te hunga i kī he nui rawa ngā rōpū, ā, hēmanawa ana tērā te noho.

I tua atu i te tokomaha i tono anō ētahi kia āta tirohia anō te taha whakarōpū kia noho ai ko tino matatau ki a tino matatau, ko āhua mōhio ki a āhua mōhio, ā, ko autaia ki a autaia. Ka āhua hongehongea anō a matatau kia whakanohoia mai ki waenga o autaia, a autaia rānei ki waenga o matatau. He tono tēnei e āta tirohia ana anō e mātou.